

վարել հայկական դատը, քան թէ վարել են, չէին կրնար երբեք սեւէ բարիք, ազատութիւն բերել հայ ժողովուրդին, որ անոնց բոլոր ծրարազիրներն ու ստորագրած դաշնագիրները անխուսափելիօրէն, ճակատագրօրէն պէտք է վիժէին եւ որ միմիայն բանուոր դասակարգը ի վիճակի էր հայոց բազմաչարչար դատը լուծելու:

եւ «լուծեց»...

Այսպէս կը գրէ պատմութիւնը հայ մարքսիստներէն ամենէն հայը, անաչառութեան ծիրանի հազած հայոց պատմագիրը, ինքը փիլիսոփայ, Գաւիթ Անանուն:

(Շարունակելի)

## ՀԻՆ ՀԱՅՈՑ ԱՇԽԱՐՀԱՅԵԱՑՔԸ

Գրեց՝ ՊՐՈՑ. Ն. ԱՌՈՆՑ

### IV

Հին դասական գրականութեան մէջ Շամիրամին բախտակից է Նինոսը:

Գրեթէ բոլոր հին հեղինակները, որոնք հետաքրքրուել են արեւելեան պատմութեամբ, յիշում են Նինոս-Շամիրամեան գրոյցն այս կամ այն չափով: Նրանց սկզբնական աղբիւրն է Կտեսիասը: Սա պարսից Արտաշէս թագաւորի դրան բժիշկն էր (395) եւ մօտիկ ծանօթ էր ժամանակակից ժողովրդական գրոյցներին: Գրի է առել ի մէջի ալլոց եւ Շամիրամի եւ Նինոսի վերաբերեալ գրուցախառն պատմութիւնը, բայց նրա երկը մեզ չի հասել: Նրանից օգտուել են հետագայ պատմագիրները, քաղելով կարեւոր կտորներ, որոնց միջոցով կարելի է վերականգնել կորած բնագիրը: Առանձնապէս յարգի են Դեոդոր Սիկիլիացու քաղուածները, որոնք այսպէս են ներկայացնում Շամիրամի առասպելը:

Շամիրամը Ասորիքի Ասիալոն քաղաքի Դերկեստ աստուածուհու դուստրն էր: Քաղաքից ոչ հեռու կար մի մեծ եւ խոր լիճ, լի ձրկներով: Սրա ափին էր գտնուում հռչակաւոր տաճարը, նուիրուած աստուածուհուն, «որին ասորիները անուանում էին Դերկեստ եւ որի դէմքը կնոջ նման էր, իսկ մնացեալ մասը՝ ձրկան»:

Դերկեստոյի մասին առասպելաբանում էին, որ Աֆրոդիտէին վերաւորած լինելով, պատժուում է վերջնիս կողմից նորանով, որ սիրահարուում է մի երիտասարդի եւ նրանից ունենում է մի աղջիկ երեխայ: Դերկեստոն ամօ-

թահար ձգում է մանկան մի քարոտ եւ անպատ տեղ, եւ ինքը յուսահատ ընկնում է լիճը եւ դառնում ձուկ: Այս պատճառով ասորացիք ցարդ ձուկ չեն ուտում եւ աստուծոյ տեղ են պաշտում:

Ընկեցիկ երեխային շրջապատում են աղանիները, սնում եւ խնամում են նրան: Որը թեւերով պաշտպանում է քնքոյշ մարմինը, որը հարեւան հովիւներից կաթնեղէն է բերում եւ կերակրում: Հովիւներից մէկը պատահամաբ նկատում է երեխային, վերցնում տալիս է արքունի ախոռապետին, որի անունով կոչուում է Սեմիրամիս, որ ասորական բարբառով նշանակում է աղանի: Այդ ժամանակից ասորիները սկսում են պաշտել աղանուն իբր աստուծոյ:

Աղջիկն արդէն չափահաս էր, երբ միանգամ Նինոս թագաւորի մերձաւորներից մէկը, այցի գալով ախոռապետին, տեսնում է աղջկան եւ զմայլում նրա գեղեցիկութեամբ: Նրա անունն էր Օնն(էս), թագաւորի առաջին խորհրդականը եւ Ասորիքի հրամանատարը: Սա խնդրում է ախոռապետին եւ նրա համաձայնութեամբ առնում է Շամիրամին կնութեան: Այս գոյգից ծնւում է երկու զաւակ՝ Հիւպատ(էս) եւ Հիւպասպ(էս):

Նինոս թագաւորը, արչաւելով Բակտրիայի վերայ, տանում է հետը նաեւ Օննին: Պատերազմը երկարում է, Օննը ստիպուած է բերել տալ իր կնոջը Շամիրամին: Սա ճանապարհ է ընկնում ամուսնու մօտ, տղայի շոր հազած, որ չիմանան, թէ նա կին է: Բանակ հասնելով